

Fundacion “Respeta Bida, Semper Corda” a recorda Dia Internacional di Paz n’e estatua di Anne Frank



MUNDIALMENTE dia 21 di september ta conmemora Dia di Paz, y Fundacion “Respeta Bida, Semper Corda” a tene un ceremonia chikito n’e estatua di Anne Frank pa conmemora esaki.

Sra. Diana Pieters-Gonzales,

Presidente di e Fundacion, a hiba palabra den presencia di un publico den su mayoria di muchanan di scol.

Maybeline Arends-Croes y su grupo Tutti Frutti a presenta y siña e publico presente algun cancion di paz. Despues e fun-

dacion a bay over, hunto cu e muchanan, na planta 2 mata. Un di e matanan ta un oljfi cu ta simbolisa universalmente paz, como tambe a planta un “Carob Tree”, mientras cu sra. Munye Oduber-Winklaar a conta dos storia di e matanan aki.

Despues a bay n’e Convencion Center unda cu e muchanan a haya oportunidad di traha paloma blanco, cu tambe ta simbolisa paz, cu nan nomber pa despues colganan den un mata artificial cu lo bay Biblioteca Nacional como adorno.

E muchanan a wordo pidi pa traha un carta cu nan idea pa

por yega na un miho Aruba, pa despues bay over na entrega esakinan personalmente na Prome Minister Mike Eman, kende felismente a ricibi e muchanan den su oficina.

E mainta aki a yega su fin y e muchanan a keda cu un bunita recuerdo y a siña hopi di paz y con pa implementa esaki den nan bida diario.

